

# МОНГОЛ УЛСЫН ХУУЛЬ

2025 оны ... дугаар  
сарын ...-ны өдөр

Улаанбаатар  
хот

## ТАТВАРЫН ЕРӨНХИЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

**1 дүгээр зүйл.**Татварын ерөнхий хуульд доор дурдсан агуулгатай зүйл, хэсэг, заалт нэмсүгэй:

### **1/6 дугаар зүйлийн 6.1.51-6.1.58 дахь заалт:**

“6.1.51.“хууль даган мөрдөлтийн түвшин” гэж гааль, татварын албаны бүртгэл, мэдээллийн нэгдсэн сангийн мэдээлэлд үндэслэн татвар төлөгчийн гааль, татварын хууль тогтоомж даган мөрдөлтийг үнэлсэн үнэлгээг;

6.1.52.“хэрэглэгчийн систем” гэж татвар төлөгчийн цахим төлбөрийн баримтын мэдээллийг татварын нэгдсэн системд илгээх программ хангамжийг;

6.1.53.“хэрэглэгчийн систем нийлүүлэгч” гэж татвар төлөгчийн цахим төлбөрийн баримтын мэдээллийг гэрээний үндсэнд татварын нэгдсэн системд нийлүүлэх хуулийн этгээдийг;

6.1.54.“татварын нэгдсэн систем” гэж татварын бүртгэл, тайлагналт, ногдол төлөлт, хяналт шалгалт, мэдээллийн солилцооны үйл ажиллагааг цахим болон автоматжуулсан байдлаар нэгтгэн зохион байгуулдаг программ хангамж, татварын бүртгэл, мэдээллийн нэгдсэн сангийн мэдээллийг агуулсан системийг;

6.1.55.“төлбөр тооцоо” гэж бэлэн ба бэлэн бус гүйлгээг;

6.1.56.“төлбөрийн нэхэмжлэх” гэж нийлүүлсэн бараа, үзүүлсэн ажил, үйлчилгээний төлбөрийг нэхэмжлэх, түүний нэр, код, тоо хэмжээ, үнэ, холбогдох татварын дүн, борлуулагч, худалдан авагчийн нэр, татвар төлөгчийн дугаар, хаяг, байршил, төлбөр хүлээн авах дансны дугаар, нэхэмжилсэн огноо, төлбөр хийх хугацаа зэрэг мэдээллүүдийг агуулсан хэвлэмэл болон цахим баримтыг;

6.1.57.“төлбөрийн баримт” гэж нийлүүлсэн бараа, үзүүлсэн ажил, үйлчилгээний төлбөр хийгдсэнийг нотлох, түүний нэр, код, тоо хэмжээ, үнэ, холбогдох татварын дүн, борлуулагч, худалдан авагчийн нэр, татвар төлөгчийн дугаар, хаяг, байршил төлбөр тооцооны огноо зэрэг мэдээллүүдийг агуулсан хэвлэмэл болон цахим баримтыг;

6.1.58.“дахин давтагдашгүй төлбөрийн дугаар” гэж төлбөрийн нэхэмжлэх болон төлбөрийн баримтад тусгагдах борлуулагчийн татвар төлөгчийн дугаар, салбар, төлөөлөгчийн газартай бол салбарын дугаар, огноо, дэс дугаарыг дундаа ямар нэг тэмдэгтгүйгээр үргэлжилсэн тоон утгаар илэрхийлсэн дугаарыг.”

### **2/9 дүгээр зүйлийн 9.3 дахь хэсэг:**

“9.3.Татвар ногдуулах, татвараас хөнгөлөх, чөлөөлөхөд баримтлах “Эдийн засгийн бүх төрлийн үйл ажиллагааны салбарын ангилал”-ыг санхүү, төсвийн

асуудал эрхэлсэн Засгийн газрын гишүүн, Үндэсний статистикийн хорооны дарга хамтран батална.”

**3/13 дугаар зүйлийн 13.8 дахь хэсэг:**

“13.8.Төлбөрийн баримтын мэдээллийг доор дурдсанаас бусад этгээд танилцах эрхгүй бөгөөд задруулахыг хориглоно:

13.8.1.татварын алба;

13.8.2.статистикийн алба;

13.8.3.тухайн мэдээллийг дамжуулагч этгээд.”

**4/18 дугаар зүйлийн 18.1.11, 18.1.12 дахь заалт:**

“18.1.11.“эцсийн өмчлөгч” гэж Мөнгө угаах болон терроризмыг санхүүжүүлэхтэй тэмцэх тухай хуулийн 3.1.6-д заасныг;

18.1.12.“этгээд” гэж энэхүү зүйлийг хэрэгжүүлэхэд шаардлагатай мэдээлэл бүхий хувь хүн, хуулийн этгээд, хуулийн эрхгүй этгээдийг.”

**5/26 дугаар зүйлийн 26.13 дахь хэсэг:**

“26.13.Татвар төлөгчтэй харилцах, зөвлөн туслах үйлчилгээ үзүүлэх, татварын орлогыг төсөв хооронд хуваарилах, татварын хөнгөлөлт, чөлөөлөлт үзүүлэхтэй холбогдуулан татварын алба татвар төлөгчийн үндсэн үйл ажиллагаа явуулж буй, борлуулалтын орлогын эх үүсвэр бүхий газар зүйн байршлаас хамаарсан бүртгэлтэй байна.”

**6/35 дугаар зүйлийн 35.2.5 дахь заалт:**

“35.2.5.эрсдэлийн удирдлага нь татвар төлөгчийг эрсдэлээс урьдчилан сэргийлэх, татварын хууль тогтоомжийг сайн дураар даган мөрдөхөд дэмжин туслах.”

**7/53 дугаар зүйлийн 53.11 дэх хэсэг:**

“53.11.Татвар төлөгч энэ хуулийн 63.1-д заасан битүүмжлэн үл маргах журмаар гаргуулсан дүнгээс үлдсэн татварын өрийг 3 сар хүртэлх хугацаанд харьяалах татварын албатай тохирсон хэмжээгээр төлнө.”

**8/63 дугаар зүйлийн 63.2-63.5 дахь хэсэг:**

“63.2.Татвар төлөгчийн банкн дахь мөнгөн хөрөнгөөс суутгах татварын өрийн хэмжээ нь тухайн дансны үлдэгдлийн 80 хувиас хэтрэхгүй байна.

63.3.Татвар төлөгчийн банкн дахь дансанд ирээдүйд орж ирэх мөнгөн хөрөнгөөс суутгах татварын өрийн хэмжээ нь тухайн орлогын 80 хувиас хэтрэхгүй байна.

63.4.Татвар төлөгч битүүмжлэгдсэн данснаас ногдол ашиг, харилцан хамаарал бүхий этгээдэд төлөх төлбөр болон өөрийн буруутай үйлдлээс үүссэн

төлбөртэй холбоотой гүйлгээг хийх үед банк тухайн гүйлгээг бүрэн зогсоож, татварын өрийг битүүмжлэх мэдэгдэх хуудсанд заасан данс руу шилжүүлнэ.

63.5.Дансны битүүмжлэлийг цуцалсан талаар харьяалах татварын албаны даргын шийдвэр гарсан бол татварын алба шийдвэр гарсан өдрөөс хойш ажлын 1 өдөрт багтаан шийдвэрийн хувийг татвар төлөгчид цахимаар эсхүл цаасаар гардуулж, 24 цагийн дотор тухайн харилцагч банканд хүргүүлнэ.”

#### **9/63<sup>1</sup> дугаар зүйл.Татварын өр төлөх хугацаа сунгах**

“63<sup>1</sup>.1.Сүүлийн хоёр татварын жилд албан татвар төлөгчийн хуулийн дагуу ногдуулан тайлагнасан төлбөл зохих татварын өр төлөх хугацааг тухайн татвар төлөгчөөс бичгээр, эсхүл цахим хэлбэрээр гаргасан хүсэлтэд үндэслэн гурван сар хүртэлх хугацаагаар сунгаж болох бөгөөд өр төлөх хуваарийг харьяалах татварын албатай урьдчилан тохирно.

63<sup>1</sup>.2.Татвар төлөгч хяналт шалгалтаар тодорхойлогдсон татварын өрийг хүлээн зөвшөөрч, маргаагүй тохиолдолд түүний бичгээр, эсхүл цахимаар гаргасан хүсэлтэд үндэслэн татварын өрийг 12 хүртэл сарын хугацаанд татварын албатай урьдчилан тохирсон хуваарийн дагуу төлж болно.

63<sup>1</sup>.3.Татварын өр төлөх хуваарьт заасан хугацааны дагуу татварын өрийг төлөөгүй, Зөрчлийн тухай хуульд заасан татварын хууль зөрчих зөрчил гаргасан, мөн энэ хуулийн 30.4-д заасан тайлангийн мэдээллийн зөрүүг залруулах шаардлагыг биелүүлээгүй тохиолдолд харьяалах татварын алба хөнгөлөлтийг цуцалж, энэ хуулийн 53.7, 53.8-д заасан арга хэмжээг хэрэгжүүлнэ.

#### **10/73 дугаар зүйлийн 73.4 дэх хэсэг:**

“73.4.Татварын хяналт шалгалтын томилолтыг олгосноос шийдвэр гарах хүртэл хугацаанд төлөөгүй татварт алданги тооцохгүй.”

#### **11/76<sup>1</sup> дугаар зүйл.Татвар төлөгчийн хууль даган мөрдөлтийн түвшин**

76<sup>1</sup>.1.Гааль, татварын алба хууль даган мөрдөлтийн түвшнийг дараах үндсэн шалгуур үзүүлэлтийн дагуу тогтооно:

- 76<sup>1</sup>.1.1.татвар төлөгчийн бүртгэл;
- 76<sup>1</sup>.1.2.татварын тайлагнал;
- 76<sup>1</sup>.1.3.татвар төлөлт;
- 76<sup>1</sup>.1.4.татвар, гаалийн хууль тогтоомжийн зөрчил;
- 76<sup>1</sup>.1.5.гаалийн бүрдүүлэлт.

76<sup>1</sup>.2.Хууль даган мөрдөлтийн түвшин нь зуу хүртэлх тоон утгаар хэмжигдэх бөгөөд тоон утгад харгалзан маш сайн, сайн, дунд, муу гэж ангилна.

76<sup>1</sup>.3.Хууль даган мөрдөлтийн түвшнийг тооцох шалгуур үзүүлэлтийг энэ хуулийн 35.11-т заасан журмын дагуу шинэчилж, татвар төлөгчид мэдээлнэ.

76<sup>1</sup>.4.Татварын алба нь татвар төлөгчийн хууль даган мөрдөлтийн түвшнийг сар, улирал, жилээр тодорхойлж, татвар төлөгчид цахим татварын системээр мэдэгдэнэ.

76<sup>1</sup>.5.Энэ хуулийн 76<sup>1</sup>.2-т заасан хууль даган мөрдөлтийн түвшнийг нэмэгдсэн өртгийн албан татвар төлөх хугацааг хойшлуулах, гааль, татварын албаны зөвлөн туслах үйлчилгээг хэрэгжүүлэхэд ашиглана.”

#### **12/77 дугаар зүйлийн 77.7.16 дахь заалт:**

“77.7.16.энэ хуулийн 77.7.8-д заасан сахилгын шийтгэл оногдуулах эрхийг тушаалаар харьяа албадын дарга нарт шилжүүлж болох бөгөөд Төрийн албаны тухай хуулийн 48.1.1, 48.1.2, 48.1.3-т заасан сахилгын шийтгэлийг ногдуулах эрхтэй.”

#### **13/77<sup>1</sup> дугаар зүйл.Татвар төлөгчид үзүүлэх татварын зөвлөн туслах үйлчилгээ**

“77<sup>1</sup>.1.Татварын алба нь энэ хуулийн 75.1.1-д заасан чиг үүргээ доор дурдсан байдлаар хэрэгжүүлнэ:

77<sup>1</sup>.1.1.шинээр бүртгэгдсэн татвар төлөгчийн хэрэгцээ шаардлагад нийцсэн, татварын нийтлэг эрсдэлийн мэдээллийг агуулсан гарын авлага, заавар, зөвлөмжийг боловсруулан хүргүүлэх, танхимын болон цахим хэлбэрийн сургалтад хамруулах;

77<sup>1</sup>.1.2.харьяалах татварын алба татвар төлөгчийн хүсэлтээр татварын бүртгэл, тайлагнал, төлөлт, тайлан боловсруулалттай холбоотой мэдээлэл, заавар, зөвлөгөөг өгөх;

77<sup>1</sup>.1.3.татварын хууль тогтоомж, татварын тайлангийн маягтад өөрчлөлт орсон тохиолдолд төрийн мэдээлэл эмхэтгэл хэвлэгдсэн, эсхүл улсын нэгдсэн бүртгэлд бүртгэгдсэнээс хойш 14 хоногийн дотор тухайн өөрчлөлтийг хэрэгжүүлэхэд анхаарах асуудлуудын мэдээллийг нийт татвар төлөгчдөд татварын бүртгэл, мэдээллийн цахим системээр дамжуулан хүргүүлэх, сургалт зохион байгуулах;

77<sup>1</sup>.1.4.татвар төлөгчийн татварын хууль даган мөрдөлтийн түвшин буурах нөхцөл бүрдсэн, татварын эрсдэлийн үнэлгээнд сөргөөр нөлөөлсөн тохиолдолд энэ талаар татвар төлөгчид мэдэгдэж, татварын тайлан, ногдлоо засах, зөрчлөө арилган татварын эрсдэлээс сэргийлэх боломж олгох;

77<sup>1</sup>.1.5.татварын хууль тогтоомжийг хэрэгжүүлэх, татварын хөнгөлөлт, чөлөөлөлт эдлэх боломжийн талаар татвар төлөгчид мэдээлэл, зөвлөгөө өгөх зорилгоор хиймэл оюун ухаан болон их өгөгдөлд суурилсан, 24 цагийн турш тасралтгүй ажиллах автомат хариулагчийг ажиллуулах;

77<sup>1</sup>.1.6.худалдааны танхим, мэргэжлийн холбоо, салбарын асуудал эрхэлсэн төрийн захиргааны төв байгууллага, олон улсын байгууллага, гадаад улсын дипломат болон консулын байгууллагуудаас татварын хууль тогтоомжийг хэрэгжүүлэхтэй холбоотой тодорхой асуудлаар зөвлөгөө, сургалт авахаар ирүүлсэн хүсэлтийн дагуу сургалт, хэлэлцүүлэг зохион байгуулах;

77<sup>1</sup>.1.7.олон нийтийн татварын боловсролыг нэмэгдүүлэх зорилгоор эрх бүхий байгууллагатай хамтран сургалтын болон боловсролын хөтөлбөр боловсруулан хэрэгжүүлэх, боловсролын байгууллагуудтай хамтран ажиллах;

77<sup>1</sup>.1.8.татвар төлөгчдийн татварын боловсролыг дээшлүүлэх, татварын эрсдэлээс урьдчилан сэргийлэх, татварын хууль тогтоомжийг сурталчлан таниулах зорилгоор төр, хувийн хэвшил болон мэргэжлийн холбоодтой хамтран сургалт, хэлэлцүүлэг тогтмол зохион байгуулж, гарын авлага, зөвлөмж, аргачлалаар хангаж ажиллах;

77<sup>1</sup>.1.9.энэ хуулийн 78 дугаар зүйлд заасан татварын хууль тогтоомж хэрэгжүүлэх зөвлөмж гаргах;

77<sup>1</sup>.1.10.цахим хуудсандаа татварын хууль тогтоомжийг англи болон монгол хэлээр байршуулах, олон нийтийн мэдээллийн хэрэгслээр нийтийг хамарсан сурталчилгаа, сургалт, мэдээллийн нэвтрүүлэг зохион байгуулах, нийтлэл гаргах;

77<sup>1</sup>.1.11.хуулиар зөвшөөрсөн бусад шаардлагатай арга хэмжээг авч хэрэгжүүлэх.

77<sup>1</sup>.2.Энэ хуулийн 77<sup>1</sup>.1-д заасан гарын авлага, зөвлөмж, сургалтын материал, дүрс бичлэг, сургалтыг брайль үсэг, дохионы хэлийг ашиглах шаардлагад нийцүүлэн хөгжлийн бэрхшээлтэй иргэдийг мэдээлэл тэгш авах эрхээр хангасан байна.

77<sup>1</sup>.3.Татварын алба энэ хуулийн 77<sup>1</sup> дугаар зүйлд заасны дагуу зохион байгуулсан сургалт, хэлэлцүүлэг, зөвлөгөө, гарын авлага, зөвлөмж, хөтөлбөр мэдээллийг татварын албаны цахим хуудсанд олон нийтэд нээлттэй байршуулна.

77<sup>1</sup>.4.Энэ хуулийн 77<sup>1</sup>.1.6-д заасан хүсэлтийг хүлээн авснаас хойш 30 хоногийн дотор татварын алба хэлэлцүүлэг, сургалтын хөтөлбөрийг боловсруулан, товыг зарлан 45-аас доошгүй хоногийн хугацаанд хэлэлцүүлэг, сургалтыг зохион байгуулна. Хэлэлцүүлэг, сургалтын тов, хөтөлбөрийг Монголын худалдаа, аж үйлдвэрийн танхим, тухайн аж ахуйн нэгжийн үйл ажиллагааны салбарын мэргэжлийн холбоо болон бүх татвар төлөгчдөд нээлттэй байна.

77<sup>1</sup>.5.Энэ хуулийн 77<sup>1</sup>.5-д заасан хэлэлцүүлэг, сургалтын хөтөлбөрийг Монголын татварын мэргэшсэн зөвлөхийн нийгэмлэг болон шаардлагатай бусад мэргэжлийн холбоод хамтран боловсруулж, зохион байгуулна.”

#### **14/78 дугаар зүйлийн 78.8 дахь хэсэг:**

“78.8.Татварын алба энэ хуулийн 78.1.1-д заасан хүсэлтийг хүлээн авах шаардлагагүй гэж үзсэн тохиолдолд холбогдох тайлбарыг 30 хоногийн дотор хүргүүлэх ба хүлээн авсан тохиолдолд улсын ерөнхий байцаагч 90 хоногт багтаан зөвлөмж гаргана.”

#### **15/84 дүгээр зүйлийн 84.1.6 дахь заалт:**

“84.1.6.хуульд заасан шаардлага хангаагүй, бодитоор худалдан аваагүй бараа, ажил үйлчилгээг тайлагнан илүү төлөлт үүсгэсэн, төсөвт төлөх татварыг бууруулсан.”

**2 дугаар зүйл.**Татварын ерөнхий хуулийн 18 дугаар зүйлийн 18.3.1.а дахь дэд заалтын “мэдээллийг” гэсний дараа “хүсэх,” гэж, 18.3.1.г дэх дэд заалтын “24” гэсний дараа “, 34” гэж, 18.7 дахь хэсгийн “үндсэн дээр” гэсний дараа “аливаа этгээд,” гэж, 31 дүгээр зүйлийн 31.1 дэх хэсгийн “дараагийн” гэсний дараа “хоёр” гэж, 33 дугаар зүйлийн 33.3 дахь хэсгийн “сангийн” гэсний дараа “болон нэгдсэн системийн” гэж, 35 дугаар зүйлийн 35.11 дэх хэсгийн “хорооны” гэсний дараа “татвар төлөгчийн хууль даган мөрдөлтийн түвшнийг тодорхойлох, мэдэгдэх” гэж, 46 дугаар зүйлийн 46.1 дэх хэсгийн “бүхий” гэсний дараа “хараат бус, мэргэжлийн” гэж, 47 дугаар зүйлийн 47.11 дэх хэсгийн “актыг” гэсний дараа “бүрэн буюу хэсэгчлэн” гэж, мөн зүйлийн 47.12 дахь хэсгийн “ногдуулалтын акт” гэсний дараа “, эсхүл актын холбогдох хэсэг” гэж, мөн зүйлийн 47.15 дахь хэсгийн “гомдлыг” гэсний дараа “хэлэлцэх хурлын товыг зарлаж, татвар төлөгч хүндэтгэн үзэх шалтгааны улмаас хурал хойшлуулах хүсэлт гаргаснаас бусад тохиолдолд гомдлыг тов зарласнаас хойш 30 хоногийн дотор” гэж, 53 дугаар зүйлийн 53.1.3 дахь заалтын “ажиллагаагаа” гэсний дараа “эрх бүхий байгууллагын шийдвэрээр” гэж, 74 дүгээр зүйлийн 74.2 дахь хэсгийн “тасаг,” гэсний дараа “татварын улсын ахлах байцаагч,” гэж, 75 дугаар зүйлийн 75.2 дахь хэсгийн “хангаж,” гэсний дараа “эрсдэлээс урьдчилан сэргийлэх, холбогдох зөвлөгөө өгөх,” гэж, 77 дугаар зүйлийн 77.2 дахь хэсгийн “тасаг,” гэсний дараа “татварын улсын ахлах байцаагч,” гэж, 84 дүгээр зүйлийн 84.1 дэх хэсгийн “дүнгийн” гэсний дараа “, эсхүл буцаан авах татварыг нэмэгдүүлсэн бол нэмэгдүүлсэн дүнгийн” гэж, мөн зүйлийн 84.1.3 дахь заалтын “татварыг” гэсний дараа “тайлагнаж,” гэж тус тус нэмсүгэй.

**3 дугаар зүйл.**Татварын ерөнхий хуулийн дараах хэсэг, заалтыг доор дурдсанаар өөрчлөн найруулсугай:

**1/13 дугаар зүйлийн 13.2 дахь хэсэг:**

“13.2.Татварын алба, татварын улсын байцаагч, татварын албаны бусад ажилтан, татварын албанд ажиллаж байсан, гэрээний хүрээнд ажил, үйлчилгээ үзүүлсэн этгээд, татварын албаны хэрэгжүүлэх нийтлэг үйл ажиллагаанд хөндлөнгийн гэрчээр оролцсон хүн нь албан үүргээ гүйцэтгэх явцад олж мэдсэн татвар төлөгчийн мэдээллийн нууцыг ажиллах хугацаанд, албаны болон хөдөлмөрийн харилцаа дуусгавар болсны дараа ил болгох хүртэл хугацаанд хадгалах үүрэгтэй бөгөөд доор дурдсан албан тушаалтанд татварын албаны даргын шийдвэрээр танилцуулж болно.”

**2/46 дугаар зүйлийн 46.3, 46.4 дэх хэсэг:**

“46.3.Маргаан таслах зөвлөл нь үйл ажиллагаандаа хууль дээдлэх, бусдын нөлөөнд үл автах, ашиг сонирхлын зөрчлөөс ангид байх, татвар төлөгчийн болон татварын албаны эрх, хууль ёсны ашиг сонирхлыг хүндэтгэх, татвар төлөгчийн нууцыг хадгалах зарчим баримтална.”

46.4.Маргаан таслах зөвлөл нь 11 хүний бүрэлдэхүүнтэй байна. Маргаан таслах зөвлөлийн ажиллах журам, гишүүдийн эрх, үүрэг, үйл ажиллагаанд хориглох зүйлс, нөлөөллийн мэдүүлгийн загвар, хөтлөх, шийдвэрлэх журмыг Засгийн газар батална.”

### **3/46 дугаар зүйлийн 46.6 дахь хэсэг:**

“46.6.Маргаан таслах зөвлөлийн гишүүн нь нягтлан бодогч, санхүүч, эдийн засагч, эсхүл эрх зүйч мэргэжилтэй, мэргэжлээрээ арваас дээш жил ажилласан туршлагатай, эрүүгийн хуульд заасан өмчлөх эрхийн эсрэг, эдийн засгийн болон авлигын гэмт хэрэг үйлдэж эрүүгийн хариуцлага хүлээж байгаагүй, сүүлийн зургаан жилд улс төрийн намын удирдах болон улс төрийн албан тушаал эрхлээгүй байна.”

### **4/53 дугаар зүйлийн 53.1.4 дэх заалт:**

“53.1.4.татвар төлөгчийн үйл ажиллагаанд 2 жил дараалан Компанийн тухай хуулийн 87.1.1 дэх заалтад заасан хувь хэмжээгээр алдагдал хүлээж, төлбөрийн чадвар муудсан нь татварын албаны хүлээн авсан тайлангаар тодорхойлогдсон.”

**4 дүгээр зүйл.**Татварын ерөнхий хуулийн 18 дугаар зүйлийн 18.1.2.а дахь дэд заалтын “банк, санхүүгийн байгууллага, тэдгээрээс томилогдсон этгээд, хөрөнгө итгэмжилсэн этгээд, зуучлагч болон батлан даах чадвар бүхий” гэснийг “аливаа” гэж, 28 дугаар зүйлийн 28.5 дахь хэсгийн “баримтыг” гэснийг “баримт, эсхүл төлбөрийн нэхэмжлэх үүсгэн” гэж, 34 дүгээр зүйлийн 34.5.5 дахь заалтын “зайлсхийх” гэснийг “зугтах” гэж, 38 дугаар зүйлийн 38.8 дахь хэсгийн “жилийн эцсийн татварын тайлангийн хамт” гэснийг “дараа оны 06 дугаар сарын 30-ны өдрийн дотор” гэж, мөн зүйлийн 38.8.1, 38.8.2 дахь заалтын “зургаа” гэснийг “арав” гэж, 53 дугаар зүйлийн 53.1.1 дэх заалтын “4.1.1-д заасан гамшиг болон үер, газар хөдлөлт, гал түймэрт өртсөн” гэснийг “4.1.1, 4.1.2, 4.1.3-т заасан гамшиг буюу аюулт үзэгдэл, аюулын улмаас татвар төлөгчид хохирол учирсан” гэж, 78 дугаар зүйлийн 78.1.1 дэх заалтын “төлөгчийн” гэснийг “төлөгч, Монголын худалдаа аж үйлдвэрийн танхим, мэргэжлийн холбоо, татварын мэргэшсэн зөвлөхийн нийгэмлэгийн” гэж, 84 дүгээр зүйлийн 84.1.5 дахь заалтын “падаан” гэснийг “төлбөрийн нэхэмжлэх” гэж тус тус өөрчилсүгэй.

**5 дугаар зүйл.**Татварын ерөнхий хуулийн 46 дугаар зүйлийн 46.8 дахь хэсгийн “тухайн шатны” гэснийг, мөн зүйлийн 46.9 дэх хэсгийн “Аймаг, нийслэл, улсын зэрэглэлтэй хотын татварын албаны дэргэдэх Маргаан таслах зөвлөлийн бүрэлдэхүүн болон даргыг татварын асуудал хариуцсан төрийн захиргааны байгууллагын дарга,” гэснийг тус тус хассугай.

**6 дугаар зүйл.**Татварын ерөнхий хуулийн 27 дугаар зүйлийн 27.1.11 дэх заалт, 46 дугаар зүйлийн 46.5.1 дэх заалт, 47 дугаар зүйлийн 47.5 дахь хэсэг, 75 дугаар зүйлийн 75.6, 75.7, 75.8 дахь хэсэг, 82 дугаар зүйлийн 82.2 дахь хэсэг, 83 дугаар зүйлийн 83.3 дахь хэсэг, 84 дүгээр зүйлийн 84.2 дахь хэсгийг тус тус хүчингүй болсонд тооцугай.

**7 дугаар зүйл.**Энэ хуулийн 1 дүгээр зүйлийн 13 дахь хэсгийг 2026 оны 07 дугаар сарын 01-ний өдрөөс эхлэн дагаж мөрдөнө.

**8 дугаар зүйл.**Энэ хуулийг 2026 оны 01 дүгээр 01-ний өдрөөс эхлэн дагаж мөрдөнө.